

BOSNA I HERCEGOVINA
FEDERACIJA BOSNE I HERCEGOVINE
TUZLANSKI KANTON
OPĆINSKI SUD U BANOVIĆIMA
Broj: 127 0 P 071591 24 I
Banovići, 03.09.2024. godine

Općinski sud u Banovićima, po sudiji Jasminki Radunović-Kostić, u izvršnom postupku tražioca izvršenja Tuzlanski kanton, Općinski suda u Banovićima, zastupan po Kantonalnom pravobranilaštvu Tuzla, protiv izvršenika H.G. iz ... , općina B., zastupan po punomoćniku Mevludinu Glavinić, advokatu iz Živinica, radi izvršenja na pokretnim stvarima, v.sp. 300,00 KM, odlučujući o prigovoru izvršenika od 19.02.2024. godine, dana 03.09.2024.godine donio je slijedeće:

R J E Š E N J E

ODBIJA SE kao neosnovan prigovor izvršenika, pa se rješenje o izvršenju Općinskog suda u Banovićima broj: 127 0 P 071591 24 I od 05.02.2024. godine, u cijelosti održava na snazi.

O b r a z l o ž e n j e

Tražilac izvršenja je dana 08.01.2024. godine, kod ovog suda podnio prijedlog za izvršenje protiv izvršenika na temelju pravomoćnog rješenja Općinskog suda u Banovićima broj: 127 0 P 071591 18 P od 23.05.2019. godine.

Rješenjem o izvršenju Općinskog suda u Banovićima broj: 127 0 P 071591 24 I od 05.02.2024. godine određeno je izvršenje pljenidbom, procjenom i prodajom pokretnih stvari izvršenika, radi naplate duga- sudske takse na tužbu u iznosu od 300,00 KM.

Na navedeno rješenje o izvršenju, izvršenik je putem punomoćnika blagovremeno uložio prigovor zbog člana 47. stav 1. ZIP-a, F BiH u vezi sa članom 10. stav 1. ZPP-u F BiH. U kojem navodi da je izrekom rješenja o izvršenju iz naslova sud u Banovićima odredio izvršenje po prijedlogu tražioca izvršenja, protiv izvršenika na osnovu pravosnažnog i izvršnog rješenja Općinskog suda u Banovićima broj: 127 0 P 071591 18 P od 23.05.2019. godine u iznosu i na način određen u prijedlogu za izvršenje od 08.01.2024.godine, koji je sastavni dio rješenja odnosno pljenidbom, procjenom i prodajom pokretnih stvari izvršenika, a u vezi opomena za plaćanje sudske takse od 14.03.2019.godine, a na osnovu Zakona o sudskim taksama koju je tražilac lično zaprimio dana 20.03.2019.godine.

Navedeno Rješenje o izvršenju smatra neosnovanim iz razloga navedenih u osnovu prigovora, obzirom da sud nije postupio u skladu sa Zakonom o izvršnom postupku, odnosno u vezi Zakona o parničnom postupku F BiH; koje se odnose na dostavljanje pismena suda strankama, jer izvršenik nije primio poziv za plaćanje sudske takse kako je to propisano zakonom zbog čega je činjenično stanje pogrešno utvrđeno, niti je postupio po prijedlogu kako je to tražio tražilac izvršenja, te je po tim osnovima pogrešno primijenio materijalno pravo što navedeno rješenje ne čini osnovanim, jer

nije ispunjen uslov prigovornog razloga. Predlaže uvažavanje prigovora i obustavu izvršnog postupka protiv izvršenika.

Odgovor na prigovor nije dat.

Prigovor izvršenika je neosnovan.

Prilikom odlučivanja o prigovoru sud je pošao od odgovarajućih odredbi Zakona o izvršnom postupku („Službene novine Federacije BiH „br. 32/03), te izvršio uvid u spis ovog suda broj: 127 0 P 071591 18 P i odlučio kao u izreci rješenje iz sljedećih razloga:

Naime, u konkretnom slučaju potraživanje tražioca izvršenja zasniva na izvršnoj ispravi, rješenju Općinskog suda u Banovićima broj: 127 0 P 071591 18 P od 23.05.2019. godine, koje ima svojstvo izvršne isprave u skladu sa članom 23. stav 1. tačka. 2. Zakona o izvršnom postupku F BiH. Izvršenik ni jednim dokazom nije osporio izvršnu ispravu na kojoj stoji potvrda izvršnosti u odnosu na izvršenika, tj. nije dokazao da je ista ukinuta, poništena, preinačena ili na drugi način stavljena van snage, odnosno da je na drugi način izgubila svoju djelotvornost ili je utvrđeno da je ista bez učinka.

Na drugačiju odluku suda ne utiču navodi izvršenika, obzirom da je sud izvršni uvid u parnični spis broj: 127 0 P 071591 18 P, te utvrdio da je rješenje kojim se nalaže plaćanje takse od 23.05.2019.godine izvršenik lično primio dana 05.06.2019.godine, a izvršni sud nema ovlaštenja da preispituje izvršne isprave niti da ih mijenja i ukida, sve dok postoji izvršna isprava izvršni sud je dužan izvršavati, a osim toga, sud će u daljem toku postupka odlučiti o eventualnom postojanju smetnji za provođenje izvršenja na predloženom predmetu i sredstvu izvršenja.

Kako se prigovor izvršenika ne zasniva ni na jednom razlogu za izjavljivanje prigovora na rješenje o izvršenju propisane članom 47. Zakona o izvršnom postupku F BiH, sud je odlučio kao u dispozitivu rješenja, primjenom člana 49. stav 1. Zakona o izvršnom postupku F BiH („Službene novine F BiH“ br. 32/03, 52/03, 33 /06, 39/06 i 39/09).

Sudija
Jasminka Radunović –Kostić

Pouka o pravnom lijeku:

Protiv ovog rješenja dozvoljena je žalba Kantonalnom sudu u Tuzli, u roku od 8 dana od dana prijema ovog rješenja. Žalba se podnosi putem ovog suda u dovoljnom broju primjeraka za sud i stranke.